

御定全唐詩錄

土岐文庫
文庫17
W65
13



金華寺藏書
卷之三
韋應物



010185189290

文庫 17
W 65
13



御定全唐詩錄卷第三十六

禮部侍郎臣徐倬翰林院侍讀學士臣徐元正奉

旨校刊

韋應物

應物京兆長安人周道遙公叟之後少以三衛郎
事明皇後折節讀書辟從事河陽永泰中授京兆
功曹遷洛陽丞兩軍騎士驕橫繩以法被訟棄官
起為鄆令大曆中制除櫟陽令復以疾謝歸建中
初拜比部員外郎出為滁州刺史久之改江州追
赴闕擢左司郎中貞元初復出為蘇州刺史應物
性高潔鮮食寡欲所居焚香掃地而坐其為詩馳

韋應物

昭和六十年二月一日贈
土岐善唐氏寄

驟建安以還各得風韻而擺去陳言格力閑暇意致簡遠超然似其為人詩家比之陶元亮稱陶韋云

白樂天云蘇州歌行才麗之外頗近興諷其五言詩又高雅閑淡自成一家體今之秉筆者誰能及之然當蘇州在時人亦未甚愛重必待身後然後貴之

蘇東坡云蘇李劉曹謝陶固已至矣李杜以絕世之資凌跨百代後之詩人繼出而才不逮意獨應物柳子厚發纖穠於簡古寄至味於澹泊非餘子所及也

朱晦菴語錄云蘇州高於王維孟浩然諸人以其無聲色臭味也又云其詩無一字造作直是自在氣象近道

劉須溪云韋應物居官自愧閔閔有恤人之心其詩如深山採藥飲泉坐石日晏忘歸與孟浩然雖意趣相似而出處不同又云誦韋蘇州一二語高處有山泉極品之味

古體詩

相逢行

二十登漢朝英聲邁今古適從東方來又欲謁明主猶酣新豐酒尚帶灞陵雨邂逅兩相逢別來問寒暑寧知

白日晚暫向花間語忽聞長樂鐘走馬東西去

鷓鴣啼

可憐鷓鴣飛飛向樹南枝南枝日照暖北枝霜露滋露
滋不堪棲使我夜常啼願逢雲中鶴啣我向寥廓願作
城上烏一年生九雛何不舊巢住枝弱不得去何意道
苦辛客子常畏人

擬古詩

辭君遠行邁飲此長恨端已謂道里遠如何中險艱流
水赴大壑孤雲還暮山無情尚有歸行子何獨難驅車
背鄉園朔風卷行迹嚴冬霜斷肌日入不遑息憂歡容
髮變寒暑人事易中心君詎知冰玉徒貞白

黃鳥何關關幽蘭亦靡靡此時深閨婦日照紗窗裏娟
娟雙青蛾微微啓玉齒自惜桃李年誤身遊俠子無事
久離別不知今生死

綺樓何氛氲朝日正杲杲四壁含清風丹霞射其牖玉
顏工哀嚀絕代非世有但感離恨情不知誰家婦孤雲
忽無色邊馬為迴首曲絕碧天高餘聲散秋草徘徊帷
中意獨夜不堪守思逐朔風翔一去千里道

嘉樹藹初綠蘼蕪吐幽芳君子不在賞寄之雲路長路
長信難越惜此芳時歌孤鳥去不還緘情向天末
月滿秋夜長驚鳥號北林天河橫未落斗柄當西南寒
蛩悲洞房好鳥無遺音商飈一夕至獨宿懷重衾舊交

日千里隔我浮與沈人生豈草木寒暑移此心
春至林木變洞房夕含清單居誰能裁好鳥對我鳴良
人久燕趙新愛移平生別時雙鴛綺留此千恨情碧草
生舊迹綠琴歌芳聲思將魂夢歡反側寐不成擘衣迷
所次起望空前庭孤影中自惻不知雙涕零
有客天一方寄我孤桐琴迢迢萬里隔託此傳幽音冰
霜中自結龍鳳相與吟絃以昭清直漆以形交澗
白日淇上沒空閨生遠愁寸心不可限淇水長悠悠芳
樹正妍鬱春禽自相求徘徊東西廂孤妾誰與儔年華
逐絲淚一落俱不收

雜體

沈沈匣中鏡為此塵垢蝕輝光何所如月在雲中黑南
金既雕錯鞶帶共輝飾空存鑿物名坐使妍媸惑美人
竭肝膽思照冰玉色自非磨瑩工日日空歎息
春羅雙鴛鴦出自寒夜女心精煙霧色指歷千萬緒長
安貴豪家妖艷不可數裁此百日功唯將一朝舞舞罷
復裁新豈思勞者苦
同聲自相應體質不必齊誰知賈人鐸能使大樂諧鏗
鏘發宮徵和樂變其哀人神既昭享鳳鳥亦下來豈非
至賤物一奏升天階物情苟有合莫問玉與泥

與友生野飲效陶體

攜酒花林下前有千載墳於時不共酌奈此泉下人始

自翫芳物行當念徂春聊舒遠世蹤坐望還山雲且遂
一歡笑焉知賤與貧

效陶彭澤

霜露悴百草時菊獨妍華物性有如此寒暑其奈何掇
英泛濁醪日入會田家盡醉茅簷下一生豈在多

縣齋

仲春時景好草木漸舒榮公門且無事微雨園林清泱
泱水泉動忻忻衆鳥鳴閒齋始延矚東作興庶忙即事
玩文墨抱冲披道經於焉日澹泊徒使芳尊盈

觀早朝

伐鼓通嚴城車馬溢廣墜煌煌列明燭朝服照華鮮金

門杳深沈尚聽清漏傳河漢忽已沒司閤啓晨闈丹殿
據龍首崔嵬對南山寒生千門裏日照雙闕間禁旅下
成列爐香起中天輝輝覩明聖濟濟行俊賢媿無鴛鷺
姿短翮空飛還誰當假毛羽雲路相追攀

燕居即事

蕭條竹林院風雨叢蘭折幽鳥林上啼青苔人跡絕燕
居日已永夏木紛成結几閣積羣書時來北窗閱

幽居

貴賤雖異等出門皆有營獨無外物牽遂此幽居情微
雨夜來過不知春草生青山忽已曙鳥雀繞舍鳴時與
道人偶或隨樵者行自當安蹇劣誰謂薄世榮

曉坐西齋

蓼蓼城鼓動稍稍林鷗去柳意不勝春巖光已知曙寢齋有單綈靈藥為朝茹盥漱忻景清焚香澄神慮公門自常事道心寧異處

野居

結髮屢辭秩立身本疎慢今得罷守歸幸無世欲患棲止且偏僻嬉遊無早晏逐兔上坡岡捕魚緣石澗高歌意氣在貰酒貧居慣時啓北窗扉豈將文墨間

秋夜

暗窗涼葉動秋齋寢席單憂人半夜起明月在林端一與清景遇每憶平生歡如何方惻愴披衣露更寒

西郊燕集

濟濟衆君子高晏及時光羣山靄遐矚綠野布熙陽列坐遵曲岸披襟襲蘭芳野庖薦嘉魚激澗泛羽觴衆鳥鳴茂林綠草延高岡盛時易徂謝浩思坐飄颻眷言同心友茲遊安可忘

南塘泛舟會元六昆季

端居倦時燠輕舟泛迴塘微風飄襟散橫吹繞林長雲澹水容夕雨微荷氣涼一寫惰勤意寧用計華觴

郡齋雨中與諸文士燕集

兵衛森畫戟宴寢凝清香海上風雨至逍遙池閣涼煩痾近消散嘉賓復滿堂自慙居處崇未覩斯民康理會

是非遣性達形迹忘鮮肥屬時禁蔬果幸見嘗俯飲一杯酒仰聆金玉章神歡體自輕意欲凌風翔吳中盛文史羣彥今汪洋方知大藩地豈曰財賦疆

登樂遊廟作

高原出東城鬱鬱見咸陽上有千載事乃自漢宣皇頽孺久凌遲陳迹翳丘荒春草雖復綠驚風但飄揚周覽京城內雙闕起中央微鐘何處來暮色忽蒼蒼歌吹喧萬井車馬塞康莊昔人豈不爾百世同一傷歸當守冲漠跡寓心自忘

登西南岡卜居遇雨尋竹浪至澧壩縈帶數里清流茂樹雲物可賞

登高創危構林表見川流微雨颯已至蕭條川氣秋下尋密竹盡忽曠沙際遊紆曲水分野綿延稼盈疇寒花明廢墟樵牧笑榛丘雲水成陰澹竹樹更清幽適自戀佳賞復茲永日留

澧上與幼遐月夜登西岡翫花

置酒臨高隅佳人自城闕已翫滿川花還看滿川月方浩然賞心何由歇

遊龍門香山泉

山水本自佳遊人已忘慮碧泉更幽絕賞愛未能去潺湲瀉幽磴繚繞帶嘉樹激轉忽殊流歸泓又同注羽觴自成翫永日亦延趣靈草有時香仙源不知處還當候

圓月攜手重遊寓

龍門遊眺

鑿山導伊流中斷若天闢都門遙相望佳氣生朝夕素
懷出塵意適有攜手客精舍繚層阿千龕鄰峭壁綠雲
路猶緬憇澗鐘已寂花樹發煙華淙流散石脈長嘯招
遠風臨潭漱金碧日落望都城人間何役役

西郊遊矚

東風散餘馭陂水淡已綠烟芳何處尋杳靄春山曲新
禽弄暄節晴光泛嘉木一與諸君遊華觴忻見屬

再遊西郊渡

水曲一追遊遊人重懷戀嬋娟昨夜月還向波中見驚

禽棲不定流芳寒未徧攜手更何時佇看花如霰

月谿與幼遐君貺同遊

岸篠覆迴谿迴溪曲如月沈沈水容綠寂寂流鶯歇淺
石方凌亂遊禽時出沒半兩夕陽霏綠源雜花發明晨
重來此同心應已闕

與幼遐君貺兄弟同遊白家竹潭

清賞非素期偶遊方自得前登絕嶺險下視深潭黑密
竹已成暮歸雲殊未極春鳥依谷喧紫蘭含幽色已將
芳景遇復款平生憶終念一歡別臨風還默默

遊靈巖寺

始入松路永獨忻山寺幽不知臨絕檻乃見西江流吳

岫分煙景楚甸散林丘方悟關塞眇重軫故園愁聞鐘
戒歸騎憇澗惜良遊地疎泉谷狹春深草木稠茲焉賞
未極清景期杪秋

秋景詣琅琊精舍

屢訪塵外跡未窮幽賞情高秋天景遠始見山水清上
陟巖殿憇暮看雲壑平蒼茫寒色起迢遞晚鐘鳴意有
清夜戀身為符竹嬰晤言緇衣子瀟灑中林行

善福精舍秋夜遲諸君

廣庭獨閒步夜色方湛然丹閣已排雲皓月正高懸繁
露降秋節蒼林鬱芊芊仰觀天氣涼高詠古人篇撫已
亮無庸結交賴羣賢屬予翹思時方子中夜眠相去隔

城闕佳期屢徂遷如何日夕待見月三四圓

東郊

吏舍跼終年出郊曠清曙楊柳散和風青山澹吾慮依
叢適自憇綠澗還復去微雨霑芳原春鳩鳴何處樂幽
心屢止遵事跡猶遽終罷期結廬慕陶真可庶

行寬禪師院

北望極長廊斜扉掩叢竹亭午一來尋院幽僧亦獨唯
聞山鳥啼愛此林下宿

藍嶺精舍

石壁精舍高排雲聊直上佳遊愜始願忘險得前賞崖
傾景方晦谷轉川如掌綠林含蕭條飛閣起弘敞道人

上方至深夜還獨往日落羣山陰天秋百泉響所嗟累
已成安得長偃仰

遊琅琊山寺

受命恤人隱茲遊久未遑鳴騶響幽谷前旌耀崇岡青
冥臺砌寒綠縟草木香填壑躋花界疊石構雲房經製
隨巖轉繚繞豈定方新泉泄陰壁高蘿蔭綠塘攀林一
棲止飲水得清涼物累誠可遣疲暈終未忘還歸坐郡
閣但見山蒼蒼

簡寂觀西澗瀑布下作

淙流絕壁散虛煙翠澗深叢際松風起飄來灑塵襟窺
蘿翫猿鳥解組傲雲林茶果邀真侶觴酌洽同心曠歲

懷茲賞行春始重尋聊將橫吹笛一寫山水音

遊南齋

池上鳴佳禽僧齋日幽寂高林晚露清紅藥無人摘春
水不生煙荒岡筠翳石不應朝夕遊良為蹉跎客

同元錫題琅琊寺

適從郡邑喧又茲三伏熱山中清景多石罅寒泉潔花
香天界事松竹人間別殿分嵐嶺明磴臨懸壑絕昏旭
窮陟降幽顯盡披閱嶽駭風雨區寒知龍蛇穴情虛澹
泊生境寂塵妄滅經世豈非道無為厭車轍

往雲門郊居塗經迴流作

茲晨迺休暇適往田家廬原谷經塗澁春陽草木敷纔

遵板橋曲復此清澗紆崩壑方見射迴流忽已舒明滅
泛孤景杳靄含夕虛無將為邑志一酌澄波餘

乘月過西郊渡

遠山含紫氛春野靄云暮值此歸時月留連西澗渡謬
當文墨會得與羣英遇賞逐亂流翻心將清景悟行車
儼未轉芳草空盈步已舉候亭火猶愛村原樹還當守
故扃悵恨乘幽素

夕次盱眙縣

落帆逗淮鎮停舫臨孤驛浩浩風起波冥冥日沈夕人
歸山郭暗雁下蘆州白獨夜憶秦關聽鐘未眠客

春月觀省屬城始憇東西林精舍

因時省風俗布惠迨高年建隼出潯陽整駕遊山川白
雲斂晴壑羣峯列遙天嶽崎石門狀杳靄香爐煙榛荒
屢冒罽逼側殆覆顛方臻釋氏廬時物屢華妍曇遠昔
經始於茲閱幽元東西竹林寺灌注寒澗泉人事旣云
泯歲月復已綿殿宇餘丹紺磴閣峭欹懸佳士亦棲息
善身絕塵緣今我蒙朝寄教化敷里鄩道妙苟為得出
處理無偏心當同所尚跡豈辭纏牽

自蒲塘驛迴駕經歷山水

館宿風雨滯始晴行蓋轉潯陽山水多草木俱紛衍崎
嶇緣碧澗蒼翠踐苔蘚高樹夾潺湲崩石橫陰巘野杏
依寒拆餘雲冒嵐淺性愜形豈勞境殊路遺緬憶昔終

南下佳遊亦屢展時禽下流暮紛思何由遣

山行積雨歸途始霽

攬轡窮登降陰雨遘二旬但見白雲合不覩巖中春急
澗豈易揭峻途良難遵深林猿聲冷沮如虎跡新始霽
升陽景山水閱清晨雜花積如霧百卉萋已陳鳴騶屢
驥首歸路自忻忻

暮相思

朝出自不還暮歸花盡發豈無終日會惜此花間月空
館忽相思微鐘坐來歇

夏夜憶盧嵩

靄靄高館暮開軒滌煩襟不知湘雨來瀟灑在幽林炎

月得涼夜芳尊誰與斟故人南北居累月間徽音人生
無閑日歡會當在今反側候天旦層城苦沈沈

春中憶元二

雨歇萬井春柔條已含綠徘徊洛陽陌惆悵杜陵曲遊
絲正高下啼鳥還斷續有酒今不同思君瑩如玉

懷素友子西

廣陌竝遊騎公堂接華襟方歡遽見別永日獨沈吟階
暝流暗駛氣疎露已侵層城湛深夜片月生幽林往歛
良未遂來覲曠無音恒當清觴宴思子玉山岑耿耿何
以寫密言空委心

始夏南園思舊里

夏首雲物變雨餘草木繁池荷初帖水林花已掃園
紫叢蝶尚亂依閣鳥猶喧對此殘芳月憶在漢陵原

睢陽感懷

豺虎犯天網昇平無內備長驅陰山卒略踐三河地
張侯本忠烈濟世有深智堅壁梁宋間遠籌吳楚利窮年
方絕輸鄰援皆攜貳使者罟其庭救兵終不至重圍雖
可越藩翰諒難棄饑喉待危巢懸命中路墜甘從鋒刃
斃莫奪堅貞志宿將降賊庭儒生獨全義空城唯白骨
同往無賤貴哀哉豈獨今千載當歎歎

庭儒生獨全義宿將謂許遠儒生謂張巡也蓋當時物議以為巡死而遠就虜疑遠畏死而辭服於賊故應物云爾韓愈嘗有言曰遠如畏死何苦守尺寸之地食其所愛之肉以與賊抗而不降乎斯言得矣巡死後賊將生致遠於偃師遠亦以不屈死則是遠亦終死賊也

廣德中洛陽作

生長太平日不知太平歡今還洛陽中感此方苦酸
飲藥本攻病毒腸翻自殘王師涉河洛玉石俱不完時節
屢遷斥山河長鬱盤蕭條孤煙絕日入空城寒蹇劣乏
高步緝遺守微官西懷咸陽道躑躅心不安

長安遇馮著

客從東方來衣上灞陵雨問客來何為采山因買斧冥
冥花正開颺颺燕新乳昨別今已春鬢絲生幾縷

逢楊開府

少事武皇帝無賴恃恩私身作里中橫家藏亡命兒朝
提樗蒲局暮竊東鄰姬司隸不敢捕立在白玉墀驪山

風雪夜長楊羽獵時一字都不識飲酒肆頑癡武皇升
仙去憔悴被人欺讀書事已晚把筆學題詩兩府始收
跡南宮謬見推非才果不容出守撫惇嫠忽逢楊開府
論舊涕俱垂坐客何由識唯有故人知

酬鄭戶曹驪山感懷

蒼山何鬱盤飛閣凌上清先帝昔好道下元朝百靈白
雲已蕭條麋鹿但縱橫泉水今尚暖舊林亦青青我念
綺襦歲扈從當太平小臣職前驅馳道出灞亭翻翻日
月旗殷殷鞀鼓聲萬馬自騰驤八駿按轡行日出煙嶠
綠氛氳麗層甍登臨起遐想沐浴觀聖情朝燕詠無事
時豐賀國禎日和絃管音下使萬室聽海內湊朝貢賢

愚共歡榮合沓車馬喧西聞長安城事往世如寄感深
迹所經申章報蘭藻一望雙涕零

清都觀荅幼遐

逍遙仙家子日夕朝玉皇興高青露沒渴飲瓊華漿解
組一來欸披衣拂天香粲然顧我笑綠簡發新章泠泠
如玉音馥馥若蘭芳浩意坐盈此月華殊未央却念誼
譁日何由得清涼疎松抗高殿密竹陰長廊榮名等糞
土攜手隨風翔

荅暢校書當

偶然棄官去投跡在田中日出照茅屋園林養愚蒙雖
云無一資尊酌會不空且忻百穀成仰嘆造化功出入

與民伍作事靡不同時伐南澗竹夜還澧水東貧蹇自成退豈為高人蹤覽君金玉篇彩色發我容日日欲為報方春已徂冬

荅僦奴重陽二甥

僦奴趙氏甥伉重陽崔氏甥播

棄職曾守拙翫幽遂忘喧山澗依磽壻竹樹蔭清源貧居煙火絕歲熟梨棗繁風雨飄茅屋蒿草沒瓜園羣屬相歡悅不覺過朝昏有時看禾黍落日上秋原飲酒任真性揮筆肆狂言一朝忝蘭省三載居遠藩復與諸弟子篇翰每相敦西園休習射南池對芳尊山藥經雨碧海榴凌霜翻念爾不同此悵然復一論重陽守故家僦子旅湘沅俱有緘中藻惻惻動離魂不知何日見衣上

淚空存

閒居贈友

補吏多下遷罷歸聊自度園廬既蕪沒煙景空澹泊閒居養痾瘵守素甘葵藿顏鬢日衰耗冠帶亦寥落青苔已生路綠筠始分籜夕氣下遙陰微風動疎薄草元良見誚杜門無請託非君好事者誰能顧寂莫

休沐東還胄貴里示端

宦遊二十載田野久已疎休沐遂茲日一來還故墟山明宿雨霽風暖百卉舒泓泓野泉潔熠熠林光初竹木稍摧翳園場亦荒蕪俯驚鬢已衰周覽昔所娛存沒惻私懷遷變傷里閭欲言少留心中復畏簡書世道良自

退榮名亦空虛與子終攜手歲晏當來居

示全真元常

余辭郡符去爾為外事牽寧知風雪夜復此對床眠始
話南池飲更詠西樓篇無將一會易歲月坐推遷

初發揚子寄元大校書

悽悽去親愛泛泛入煙霧歸棹洛陽人殘鐘廣陵樹今
朝此為別何處還相遇世事波上舟沿洄安得住

同德寺雨後寄元侍御李博士

川上風雨來須臾滿城闕岩堯青蓮界蕭條孤興發前
山遽已淨陰靄夜來歇喬木生夏涼流雲吐華月嚴城
自有限一水非難越相望曙河遠高齋坐超忽

寺居獨夜寄崔主簿

幽人寂不寐木葉紛紛落寒雨暗深更流螢度高閣坐
使青燈曉還傷夏衣薄寧知歲方晏離居更蕭索

園林晏起寄昭應韓明府盧主簿

田家已耕作井屋起晨煙園林鳴好鳥閒居猶獨眠不
覺朝已晏起來望青天四體一舒散情性亦忻然還復
茅簷下對酒思數賢束帶理官府簡牘盈目前當念中
林賞覽物遍山川士非遇明世庶以道自全

寄暢當

寇賊起東山英俊方未閒聞君新應募籍籍動京關出
身文翰場高步不可攀青袍未及解白羽插霄間昔為

瓊樹姿今有風霜顏秋郊細柳道走馬一夕還丈夫當
為國破敵如摧山何必事州府坐使鬚毛斑

寄全椒山中道士

今朝郡齋冷忽念山中客澗底東荆薪歸來煮白石欲
持一瓢酒遠慰風雨夕落葉滿空山何處尋行跡

送李十四山人東遊

聖朝有遺逸披膽謁至尊豈是買榮寵誓將救元元權
豪非所便書奏寢禁門高歌長安酒忠憤不可吞歟來
客河落日與靜者論濟世翻小事丹砂駐精魂東遊無
復繫梁楚多大藩高論動侯伯疎懷脫塵喧送君都門
野飲我林中尊立馬望東道白雲滿梁園踟躕欲何贈

空是平生言

喜於廣陵拜覲家兄奉送發還池州

青青連枝樹萼萼久別離客遊廣陵中俱到若有期俯
仰叙存沒哀腸發酸悲收情且為歡累日不知饑夙駕
多所迫復當還歸池長安三千里歲晏獨何為南出登
閭門驚颺左右吹所別諒非遠要令心不怡

送鄭長源

少年一相見飛轡河洛間歡遊不知罷中路忽言還冷
泠鷗絃哀悄悄冬夜間丈夫雖耿介遠別多苦顏君行
拜高堂速駕難久攀雞鳴儔侶發朔雪滿河關須臾在
今夕尊酌且循環

留別洛京親友

握手出都門，駕言適京師。豈不懷舊廬，惆悵與子辭。麗日坐高閣，清觴燕華池。昨遊倏已過，後遇良未知。念結路方永，歲陰野無暉。單車我當前，暮雪子獨歸。臨流一相望，零淚忽沾衣。

宴別幼遐與君貺兄弟

乖闕意方弭，安知忽來翔。累日重歡宴，一旦復離傷。置酒慰茲夕，秉燭坐華堂。契濶未及展，晨星出東方。征人慘已辭，車馬儼成裝。我懷自無歡，原野滿春光。羣水含時澤，野雉鳴朝陽。平生有壯志，不覺淚沾裳。况自守空宇，日夕但彷徨。

始除尚書郎別善福精舍

簡畧非世器，委身同草木。逍遙精舍居，飲酒自為足。累日曾一櫛，對書常懶讀。社臘會高年，山川恣遊矚。明世方選士，中朝懸美祿。除書忽到門，冠帶便拘束。愧忝郎署跡，謬蒙君子錄。俯仰垂華纓，飄飄翔輕轂。行將親愛別，戀此西澗曲。遠峯明夕川，夏雨生衆綠。迅風飄野路，迴首不遑宿。明晨下煙閣，白雲在幽谷。

出還

昔出喜還家，今還獨傷意。入室掩無光，銜哀寫虛位。悽悽動幽幔，寂寂驚寒吹。幼女復何知，時來庭下戲。咨嗟日復老，錯莫身如寄。家人勸我餐，對案空垂淚。

對芳樹

迢迢芳園樹列映清池曲對此傷人心還如故時綠風
條灑餘靄露葉承新旭佳人不再攀下有往來躅

過昭國里故第

不復見故人一來過故宅物變知景暄心傷覺時寂池
荒野筠合庭綠幽草積風散花意謝鳥還山光夕宿昔
方同賞詎知今念昔緘室在東廂遺器不忍覲柔翰全
分意芳巾尚染澤殘工委筐篋餘素經刀尺收此還我
家將還復愁惕永絕攜手歡空存舊行迹冥冥獨無語
杳杳將何適唯思今古同時緩傷與戚

林園晚霽

雨歇見青山落日照林園山夕煙鳥亂林清風景翻提
攜唯子弟蕭散在琴樽同遊不同意耿耿獨傷魂寂寞
鐘已盡如何還入門

秋夜

庭樹轉蕭蕭陰蟲還戚戚獨向高齋眠夜聞寒雨滴微
風時動牖殘燈尚留壁惆悵平生懷偏來委今夕
霜露已淒漫星漢復昭回朔風中夜起驚鴻千里來蕭
條涼葉下寂寞清砧哀歲晏仰空宇心事若寒灰

漢武帝雜歌

漢武好神仙黃金作臺與天近王母摘桃海上還感之
西過聊問訊欲來不來夜未央殿前青鳥先迴翔綠鬢

縈雲裾曳霧雙節飄飄下仙步白日分明到世間碧空
何處來時路玉盤捧桃將獻君踟躕未去留彩雲海水
桑田幾翻覆中間此桃四五熟可憐穆滿瑤池燕正值
花開不得薦花開子熟安可期邂逅能當漢武時顏如
芳華潔如玉心念我皇多嗜欲雖留桃核桃有靈人間
糞土種不生由來在道豈在藥徒勞方士海上行掩扇
一言相謝去如煙非煙不知處

夏水歌

出自元泉杳杳之深井汲在朱明赫赫之炎辰九天含
露未銷鑠閭闔初開賜貴人碎如墜瓊方截璐粉壁生
寒象筵布玉壺紈扇亦玲瓏座有麗人色俱素咫尺炎

涼變四時出門焦灼君詎知肥羊甘醴心悶悶飲此瑩
然何所思當念闌干鑿者苦臘月深井汗如雨

橫塘行

妾家住橫塘夫婿郗家郎玉盤的歷雙白魚湘簟玲瓏
透象牀象牀可寢魚可食不知郎意何南北岸上種蓮
豈得生池中種蓮豈得成丈夫一去花落樹妾獨長夜
心未平

聽鶯曲

東方欲曙花冥冥啼鶯相喚亦可聽乍去乍來時近遠
纔聞南陌又東城忽似上林翻下苑綿綿蠻蠻如有情
欲轉不轉意自嬌羗兒弄笛曲未調前聲後聲不相及

秦女學箏指尤澁須臾風暖朝日暝流音變作百鳥喧
誰家嬾婦驚殘夢何處愁人憶故園伯勞飛過聲跼促
戴勝下時桑田綠不及流鶯日日啼花間能使萬家春
意間有時斷續聽不了飛去花枝猶裊裊還棲碧樹鎖
千門春漏方殘一聲曉

烏引雛

日出照東城春烏鴟雛和鳴雛和鳴羽猶短巢在溪
林春正寒引飛欲集東城暖羣雛雛雛睥睨高舉翅不
及墜蓬蒿雄雌來去飛又引音聲下上懼鷹隼引雛烏
爾心急將何如何得比日搜索雀卵噉爾雛

燕啣泥

啣泥燕聲嘍嘍尾涎涎秋去何所歸春來復相見豈不
解決絕高飛碧雲裏何為地上啣泥滓啣泥雖賤意有
營杏梁朝日巢欲成不見百鳥畏人林野宿翻遭網羅
俎其肉未若啣泥入華屋燕啣泥百鳥之智莫與齊

近體詩

淮上喜會梁川故人

江漢曾為客相逢每醉還浮雲一別後流水十年間歡
笑情如舊蕭疎鬢已斑何因不歸去淮上對秋山

揚州偶會前洛陽盧耿主簿

應物頃貳洛陽
常有連騎之遊

楚塞故人稀相逢本不期猶存裏裏字忽怪鬢中絲客
舍盈樽酒江行滿篋詩更能連騎出還似洛橋時

淮上遇洛陽李主簿

結茅臨古渡，卧見長淮流。窗裏人將老，門前樹已秋。寒山獨過雁，暮雨遠來舟。日夕逢歸客，那能忘舊遊。

任洛陽丞荅前長安田少府問

相逢且對酒，相問欲何如。數歲猶卑吏，家人笑著書。告歸應未得，榮宦又知疎。日日生春草，空令憶舊居。

送元倉曹歸廣陵

官間得去住，告別戀音微。舊國應無業，他鄉到是歸。楚山明月滿，淮甸夜鐘微。何處孤舟泊，遙遙心曲違。

送榆次林明府

無嗟千里遠，亦是宰王畿。策馬雨中去，逢人關外稀。邑

傳榆石在路，遶晉山微。別思方蕭索，新秋一葉飛。

送汾城王主簿

少年初帶印，汾上又經過。芳草歸時徧，情人故郡多。禁鐘春雨細，宮樹野煙和。相望東橋別，微風起夕波。

賦得暮雨送李胄

楚江微雨裏，建業暮鐘時。漠漠帆來重，冥冥鳥去遲。海門深不見，浦樹遠含滋。相送情無限，沾襟比散絲。

夜對流螢作

月暗竹亭幽，螢光拂席流。還思故園夜，更度一年秋。自愜觀書興，何慙秉燭遊。府中徒冉冉，明發好歸休。

假中枉盧二十二書，亦稱卧疾，兼訝李二久不訪。

問以詩答書因以戲李二

微官何事勞趨走服藥閒眠養不才花裏棋盤憎鳥污
枕邊書卷訝風開故人問訊緣同病芳月相思阻一杯
應笑王戎成俗物遙持麈尾獨徘徊

自鞏洛舟行入黃河即事寄府縣僚友

夾水蒼蒼路向東東南山豁大河通寒樹依微遠天外
夕陽明滅亂流中孤村幾歲臨伊岸一雁初晴下朔風
為報洛橋遊宦侶扁舟不繫與心同

寄李儋元錫

去年花裏逢君別今年花開已一年世事茫茫難自料
春愁黯黯獨成眠身多疾病思田里邑有流亡愧俸錢

聞道欲來相問訊西樓望月幾回圓

郡齋臥疾

香爐宿火滅蘭燈宵影微秋齋獨卧病誰與覆寒衣

答李澣

馬卿猶有壁漁父自無家想子今何處扁舟隱荻花
林中觀易罷溪上釣鷗閒楚俗饒辭客何人最往還

宿永陽寄璨律師

遙知郡齋夜凍雪封松竹時有山僧來懸燈獨自宿

秋夜寄丘二十二員外丹

懷君屬秋夜散步詠涼天山空松子落幽人應未眠

滁州西澗

獨憐幽草澗邊生上有黃鸝深樹鳴春潮帶雨晚來急

野渡無人舟自橫

歐陽子云滁州城西乃是豐山無西澗獨城北有一澗水極淺不勝舟又江潮不到豈詩人務在佳句而實無

此景
邪
休暇日訪王侍御不遇

九日驅馳一日閒尋君不遇又空還怪來詩思清人骨

門對寒流雪滿山

酬柳郎中春日歸揚州南郭見別之作

廣陵三月花正開花裏逢君醉一迴南北相過殊不遠

暮潮從去早潮來

荅鄭騎曹重九日求橘

憐君卧病思新橘試摘猶酸亦未黃書後欲題三百顆

洞庭須待滿林霜

寒食寄京師諸弟

雨中禁火空齋冷江上流鶯獨坐聽把酒看花想諸弟

杜陵寒食草青青

送王校書

同宿高齋換時節共看移石復栽杉送君江浦已惆悵

更上西樓望遠帆

御定全唐詩錄卷第三十六

御定全唐詩錄卷第三十七

禮部侍郎臣徐倬翰林院侍讀學士臣徐元正奉

旨校刊

柳宗元

宗元字子厚其先河東人少聰警絕倫為文章卓
偉精緻與古為侔尤擅西漢詩騷一時行輩推仰
貞元初登進士博學宏詞科授校書調藍田尉貞
元十九年為監察御史裏行順宗時王叔文韋執
誼引入禁近與計事擢禮部員外郎欲大進用俄
而叔文敗貶邵州刺史不半道貶永州司馬既被
竄斥地又荒厲因自放山澤間其堙厄感鬱一寓

諸詩文讀者悲惻元和十年徙柳州刺史時劉禹錫貶播州宗元曰播非人所居而禹錫親在堂吾不忍其窮無辭以白其大人如不往便為母子永訣即具奏願以柳州授禹錫而自往播會大臣亦為禹錫請因改連州南方為進士者走數千里從宗元游經指授者為文辭皆有法世號柳柳州蘇東坡云子厚詩在淵明下韋蘇州上退之豪放奇險則過之而溫麗清深不及也朱晦菴云學詩須從陶柳門庭入也

古體詩

平淮夷雅二篇

有表

臣宗元言臣負罪竄伏違尚書牋奏十有四年聖恩寬宥命守遐壤懷印曳紱有社有人臣宗元誠感誠荷頓首頓首伏惟睿聖文武皇帝陛下天造神斷克清大憝金鼓一動萬方畢臣太平之功中興之德推校千古無所與讓臣伏自忖度有方剛之力不得備戎行致死命況今已無事思報國恩獨惟文章伏見周宣王時稱中興其道彰大于後罕及然徵於詩大小雅其選徒出狩則車攻吉日命官分土則嵩高韓奕烝人南征北伐則六月采芑平淮夷則江漢常武鏗鉤炳耀盪人耳目故宣王之形容與其輔佐

由今望之若神人然此無他以雅故也臣伏見
陛下自即位以來平夏州夷劔南取江東定河
北今又發自天衷克翦淮右而大雅不作臣誠
不佞然不勝憤懣伏以朝多文臣不敢盡專數
事謹撰平淮夷雅二篇雖不及尹吉甫召穆公
等庶施之後代有以佐唐之光明謹昧死再拜
以獻臣宗元誠恐誠懼頓首頓首謹言

皇武命丞相度董師集大功也

皇耆其武于澱于淮旣巾乃車環蔡其來狡衆昏囂甚
毒于醒狂奔叫呶以干大刑

皇咨于度惟汝一德曠誅四紀其猷汝克錫汝斧鉞其

往視師師是蔡人以宥以釐

度拜稽首廟于元龜旣禡旣類于社是宜金節煌煌錫

盾雕戈犀甲熊旂威命是荷

度拜稽首出次于東天子餞之疊學是崇鼎臚俎載五

獻百籩凡百卿士班以周旋

旣涉于滄乃翼乃前孰圖厥猶其佐多賢宛宛周道于

山于川遠揚邇昭陟降連連

我旆我旗于道于陌訓于羣帥拳勇來格公曰徐之無

恃維維式和爾容惟義之宅

進次于郾彼昏卒狂哀兇鞠頑鋒蝟斧塘赤子匍匐厥

父是亢怒其萌芽以悖太陽

王旅渾渾是佚是怙既獲敵師若饑得舖蔡兇伊窘悉
起來聚左擣其虛靡愆厥慮

載闢載被丞相是臨弛其武刑諭我德心其危既安有
長如林曾是謹諂化為謳吟

皇曰來歸汝復相予爵之成國胙以夏區度拜稽首天
子聖神度拜稽首皇祐下人

淮夷既平震是朔南宜廟宜郊以告德音歸牛休馬豐
稼于埜我武惟皇永保無疆

右皇武十有一章章八句

方城命愬守也卒入蔡得其大醜以平淮右

方城臨臨王卒峙之匪徼匪競皇有正命皇命于愬往

舒余仁踣彼艱頑柔惠是馴

愬拜即命于皇之訓既礪既攻以後厥刃王師嶷嶷熊
羆是式銜勇韜力日思予殛

寇昏以狂敢蹈愬疆士獲厥心大袒高驤長戟酋矛粲
其綏章右翦左屠聿禽其良

其良既宥告以父母恩柔于肌卒貢爾有維彼攸恃乃
偵乃誘維彼攸宅乃發乃守

其恃爰獲我功我多陰謀厥圖以究爾訛雨雪洋洋大
風來加于燠其寒于邇其遐

汝陰之茫懸瓠之莪是震是拔大殲厥家狡虜既靡系輸
于國都示之市人即社行誅

乃諭乃止蔡有厚喜完其室家仰父俯子汝水云云既清而瀾蔡人行歌我步逶遲

蔡人歌矣蔡風和矣孰類蔡初胡孰爾居式慕以康為愿有餘是究是咨皇德既舒

皇曰咨愬裕乃父功昔我文祖惟西平是庸內誨于家外刑于邦孰是蔡人而不率從

蔡人率止惟西平有子西平有子惟我有臣疇允大邦俾惠我人于廟告功以顧萬方

右方城十有一章章八句

按此篇十有一章今止十章疑有闕文

初秋夜坐贈吳武陵

稍稍雨侵竹翻翻鵲驚叢美人隔湘浦一夕生秋風積

霧杳難極滄波浩無窮相思豈云遠即席莫與同若人抱奇音朱絃絙枯桐清商激西顛泛灑凌長空自得本無作天成諒非功希聲闕大樸聾俗何由聰

晨詣超師院讀禪經

汲井漱寒齒清心拂塵服閒持貝葉書步出東齋讀真源了無取妄跡世所逐遺言異可冥繕性何由熟道人庭宇靜苔色連深竹日出霧露餘青松如膏沐澹然離言說悟悅心自足

贈江華長老

江華道州縣名

老僧道機熟默語心皆寂去歲別春陵沿流此投跡室空無侍者巾屨唯掛壁一飯不願餘跣趺便終夕風窗

疎竹響露井寒松滴偶地即安居滿庭芳草積

再至界園巖水簾遂宿巖下

發春念長違中夏欣再覩是時植物秀杳若臨元圃歌
陽訝垂冰白日驚雷雨笙簧潭際起鸛鶴雲間舞古苔
凝青枝陰草濕翠羽蔽空素彩列激浪寒光聚的皜沈
珠淵鏘鳴捐珮浦幽巖畫屏倚新月玉鉤吐夜涼星滿
川忽疑眠洞府

法華寺石門精舍三十韻

拘情病幽鬱曠志寄高爽願言懷名緇東峯旦夕仰始
欣雲雨霽尤悅草木長道同有愛弟披拂恣心賞松谿
竄窳入石棧蚺緣上蘿葛綿層甍莓苔侵標榜密林互

對聳絕壁儼雙敞塹峭出蒙籠墟嶮臨澗澆稍疑地脈
斷悠若天梯往結構罩羣崖迴環驅萬象小劫不逾瞬
大千若在掌體空得化元觀有遺細想喧煩困蟻蠓跼
踏疲翹颺寸進諒何營尋直非所枉探奇極遙矚窮妙
閱清響理會方在今神開庶殊曩茲遊苟不嗣浩氣竟
誰養道異誠所希名賓匪余仗超摠藉外獎俛默有內
朗鑑爾揖古風終焉乃吾黨潛軀委韁鎖高步謝塵坱
蓄志徒為勞追蹤將焉做淹留值頽暮眷戀睇遐壤映
日雁連軒翻雲波泱泱殊風紛已萃鄉路悠且廣羈木
畏漂浮離旌倦搖蕩昔人歎違志出處今已兩何用期
所歸浮圖有遺像幽蹊不盈尺虛室有函丈微言信可

傳申旦稽吾類

游朝陽巖遂登西亭二十韻

謫棄殊隱淪登陟非遠郊所懷緩伊鬱詎欲肩夷巢高巖瞰清江幽窟潛神蛟開曠延陽景迴薄攢林梢西亭構其巔反宇臨呀庠背瞻星辰興下見雲雨交惜非吾鄉土得以蔭菁茆羈貫去江介世仕尚函嶠故野即澧川數畝均肥磽臺館葺荒丘池塘疏沈坳會有圭組戀遂貽山林朝薄軀信無庸瑣屑劇斗筭囚居固其宜厚羞久已包庭除植蓬艾隙牖懸蠨蛸所賴山水客扁舟枉長梢挹流敵清觴掇野代嘉肴適道有高言取樂非絃匏逍遙屏幽昧澹薄辭喧呶晨雞不余欺風雨聞嘐

嘐再期永日閑提挈移中庖

湘口館瀟湘二水所會

九疑濬傾奔臨源委縈迴會合屬空曠泓澄停風雷高館軒霞表危樓臨山隈茲辰始激霽纖雲盡褰開天秋日正中水碧無塵埃杳杳漁父吟叫叫羈鴻哀勝境豈不豫慮分固難裁升高欲自舒彌使遠念來歸流駛且廣汎舟絕沿洄

登蒲州石磯望橫江口潭島深迴斜對香零山

隱憂倦永夜凌霧臨江津猿鳴稍已疎登石娛清淪日出洲渚靜澄明晶無垠浮暉翻高禽沈景照文鱗雙江滙西奔詭怪潛坤珍孤山乃北峙森爽棲靈神洄潭或

動容島嶼疑搖振陶埴茲擇土蒲魚相與鄰信美非所
安羈心屢逡巡糾結良可解紆鬱亦已伸高歌返故室
自謂非所欣

南礪中題

秋氣集南礪獨游亭午時迴風一蕭瑟林影久參差始
至若有得稍深遂忘疲羈禽響幽谷寒藻舞淪漪去國
魂已遠懷人淚空垂孤生易為感失路少所宜索寞竟
何事徘徊祇自知誰為後來者當與此心期

遊石角過小嶺至長烏村

志適不期貴道存豈偷生久忘上封事復笑昇天行竄
逐宦湘浦搖心劇懸旌始驚陷世議終欲逃天刑歲月

殺憂慄慵疎寡將迎追遊疑所愛且復舒吾情石角恣
幽步長鳥遂遐征磴迴茂樹斷景宴寒川明曠望少行
人時聞田鶴鳴風篁冒水遠霜稻侵山平稍與人事間
益知身世輕為農信可樂居寵真虛榮喬木餘故國願
言果丹誠四支反田畝釋志東臯耕

與崔策登西山

鶴鳴楚山靜露白秋江曉連袂度危橋縈迴出林杪西
岑極遠目毫末皆可了重疊九疑高微茫洞庭小迴窮
兩儀際高出萬象表馳景泛頽波遙風遞寒篠謫居安
所習稍厭從紛擾生同胥靡遺壽等彭鏗天蹇連困顛
踣愚蒙怯幽眇非令親愛疎誰使心神悄偶茲遁山水

得以觀魚鳥吾子幸淹留緩我愁腸繞

構法華寺西亭

竄身楚南極山水窮險艱步登最高寺蕭散任疎頑西
垂下斗絕欲似窺人寰反如在幽谷榛翳不可攀命童
恣披翦葺宇橫斷山剗如判清濁飄若升雲間遠岫攢
衆頂澄江抱清灣夕照臨軒隨棲鳥當我還菡萏溢嘉
色簷簷遺清斑神舒屏羈鎖志適忘幽屏棄逐入枯槁
迨今始開顏賞心難久留離念來相關北望間親愛南
瞻雜夷蠻置之勿復道且寄須臾閑

夏夜苦熱登西樓

苦熱中夜起登樓獨褰衣山澤凝暑氣星漢湛光輝火

晶燥露滋埜靜停風威探湯汲陰井煬竈開重扉憑欄
久徬徨流汗不可揮莫辯亭毒意仰訴璿與璣諒非姑
射子靜勝安能希

覺衰

久知老會至不謂便見侵今年宜未衰稍已來相尋齒
疎髮就種奔走力不任咄此可奈何未必傷我心彭聃
安在哉周孔亦已沈古稱壽聖人曾不留至今但願得
美酒朋友常共斟是時春向暮桃李生繁陰日照天正
綠杳杳歸鴻吟出門呼所親扶杖登西林高歌足自快
商頌有遺音

遊南亭夜還叙志七十韻

唐詩集卷之三十一 柳宗元

夙抱丘壑尚率性恣遊遨中爲吏役牽十祀空怕勞外
曲徇塵輒私心寄英髦進乏廊廟器退非鄉曲豪天命
斯不易鬼責將安逃屯難果見凌剝喪宜所遭神明固
浩浩衆口徒嗷嗷投跡山水地放情詠離騷再懷曩歲
期容與馳輕舸虛館背山郭前軒面江臯重疊間浦溆
邈迤驅巖嶽積翠浮澹灩始疑負靈鼇叢林留衝飈石
礫迎飛濤曠朗天景霽樵蘇遠相號澄潭湧沈鷗牛壁
跳懸猿鹿鳴驗食桮魚樂知觀濠孤賞誠所悼暫欣良
足褻留連俯櫺檻注我壺中醪朶頤進芰實擢手持蟹
螯炊稻視爨鼎鱸鮮聞操刀野蔬盈傾筐頗雜池沼芼
緬慕鼓柷翁嘯咏哺其糟退想於陵子三咽資李糟斯

道難爲偕沈憂安所韜曲渚怨鴻鵠環洲彫蘭萼暮景
迴西岑北流遊滔滔徘徊遂昏黑遠火明連艘木落寒
山靜江空秋月高斂袂戒還徒善游矜所操趣淺戢長
柁乘溪屏輕篙曠望援溪宇哀歌叩鳴槽中川恣超忽
漫若翔且翱淹泊遂所止桮風自颼颼澗急驚鱗奔蹊
荒饑獸嗥入門守拘繫悽戚增鬱陶慕士情未忘懷人
首徒搔內顧乃無有德輶甚鴻毛名竊久自欺食浮固
云叨問牛悲覺鐘說氣驚臨牢永遁刀筆吏寧期簿書
曹中興遂羣物裂壤分鞬橐岷凶旣云捕吳寇亦已鏖
扞禦盛方虎謨明富伊咎舉披山窮木禾駕海逾蟠桃
重來越裳雉再返西旅葵左右抗槐棘縱橫羅雁羔三

辟咸肆宥衆生均覆燾安得奉皇靈在宥解天弋歸誠
慰松梓陳力開蓬蒿卜室有鄩杜名田占澧澇磻谿近
餘基阿城連故濠螟蛉願親燎茶堇甘自媻饑食期農
耕寒衣俟蠶繰及斲足為温滿腹寧復饕安將蒯及管
誰慕梁與膏弋林歐雀鷄漁澤從鱒魴觀象嘉素履陳
詩謝干旄方托麋鹿羣敢同騏驥槽處賤無溷濁固窮
無淫惱踉蹌辭束縛悅懌換煎熬登年徒負版興役趨
伐罄目眩絕渾渾耳喧息嘈嘈茲焉畢餘命富貴非吾
曹長沙哀糾纏漢陰嗤桔槔苟伸擊壤情機事息秋毫
海霧多蓊鬱越風饒腥臊寧唯迫魑魅所懼齊煮蔗知
瑩懷褚中范叔戀緜袍伊人不可期慷慨徒怱怱

按此詩重二漾

字二曹字

韋道安

道安本儒士頗擅弓劍名二十遊太行暮聞號哭聲疾
驅前致問有叟垂華纓言我故刺史失職還西京偶為
羣盜得毫縷無餘贏貨財足非恠二女皆娉婷蒼黃見
驅逐誰識死與生便當此殞命休復事晨征一聞激高
義皆裂肝膽橫挂弓問所往趨捷超崢嶸見盜寒礮陰
羅列方忿爭一矢斃酋帥餘黨號且驚麾令遞束縛纏
索相拄撐彼姝久褫魄刃下俟誅刑却立不親授諭以
從父行据收自擔肩轉道趨前程夜發敲石火山林如
晝明父子更抱持涕血紛交零頓首願歸貨納女稱舅

錫道安奮衣去義重利固輕師婚古所病合姓非用兵
竭來事儒術十載所能逞平聲慷慨張徐州朱邱揚前旌
投軀獲所願前馬出王城轅門立奇士淮水秋風生君
侯既即世麾下相欵傾立孤抗王命鐘鼓四野鳴橫潰
非所壅逆節非所嬰舉頭自引刃顧義誰顧形烈士不
忘死所死在忠貞咄嗟狗權子翕習猶趨榮我歌非悼
死所悼時世情

旦攜謝山人至愚池

新沐換輕幘曉池風露清自諧塵外意况與幽人行霞
散衆山迴天高數雁鳴機心付當路聊適羲皇情

首春逢耕者

南楚春候早餘寒已滋榮土膏釋原野百蟄競所營綴
景未及郊穡人先耦耕園林幽鳥轉渚澤新泉清農事
誠素務羈囚阻平生故池想蕪沒遺畝當榛荆慕隱既
有繫圖功遂無成聊從田父言欵曲陳此情眷然撫耒
耜回首烟雲橫

溪居

久為簪組累幸此南夷謫閑依農圃鄰偶似山林客曉
耕翻露草夜榜響溪石來往不逢人長歌楚天碧

郊居歲暮

屏居負山郭歲暮驚離索野迴樵唱來庭空燒燼落世
紛因事遠心賞隨年薄默默諒何為徒成今與昨

秋曉行南谷經荒村

杪秋霜露重晨起行幽谷黃葉覆溪橋荒村唯古木寒
花疎寂歷幽泉微斷續機心久已忘何事驚麋鹿

雨後曉行獨至愚溪北池

宿雲散洲渚曉日明村塢高樹臨清池風驚夜來雨予
心適無事偶此成賓主

中夜起望西園值月上

覺聞繁露墜開戶臨西園寒月上東嶺泠泠疎竹根石
泉遠逾響山鳥時一喧倚楹遂至旦寂寞將何言

零陵春望

平野春草綠曉鶯啼遠林日晴瀟湘渚雲斷岫嶺岑仙

駕不可望世途非所任凝情空景暮萬里蒼梧陰

法華寺西亭夜飲

祇樹夕陽亭共傾三昧酒露暗水連堦月明花覆牖莫
厭罇前醉相看未白首

茆簷下始栽竹

瘴茆葺為宇溽暑恒侵肌適有重脰疾蒸鬱寧所宜東
鄰幸薰我樹竹邀涼颺欣然愜吾志荷鍤西巖陞楚壤
多怪石墾鑿力已疲江風忽云暮輿曳還相追蕭瑟過
極浦旖旎附幽墀貞根期永固貽爾寒泉滋夜窗遂不
掩羽扇寧復持清泠集濃露枕簟淒已知網蟲依密葉
曉禽棲迴枝豈伊紛躡間重以心慮怡嘉爾亭亭質自

遠棄幽期不見野蔓草蒨蔚有華姿諒無凌寒色豈與
青山辭

種仙靈毗

窮陋闕自養癘氣劇啣煩隆冬乏霜霰日夕南風溫杖
藜下庭際曳踵不及門門有埜田吏慰我飄零魂及言
有靈藥近在湘西原服之不盈旬覽躡皆騰騫笑忤前
即吏為我擢其根蔚蔚遂充庭英翹忽已繁晨起自採
曝杵臼通夜喧靈和理內藏攻疾貴自源壅覆逃積霧
神舒委餘暄奇功苟可徵寧復資蘭蓀我聞畸人術一
氣中夜存能令涿涿息呼吸還歸跟疎放固難效且以
藥餌論痿者不忘起窮者寧復言神哉輔吾足幸及兒

女奔

種木

守閑事服餌採木東山阿東山幽且阻疲茶煩經過戒
徒斲靈根封植閱天和違爾澗底石徹我庭中莎土膏
滋元液松露墜繁柯南東自成畝繚繞紛相羅晨步佳
色媚夜眠幽氣多離憂苟可怡孰能知其他爨竹茹芳
葉寧慮瘵與瘥留連樹蕙辭婉婉採薇歌悟拙甘自足
激清愧同波單豹且理內高門復如何

早梅

早梅發高樹迴映楚天碧朔吹飄夜香繁霜滋曉日欲
為萬里贈杳杳山水隔寒英坐銷落何用慰遠客

禪堂

發地結菁茆團團抱虛白山花落幽戶中有忘機客涉
有本非取照空不待析萬籟俱緣生窅然喧中寂心境
本同如鳥飛無遺跡

田家

蓐食狗所務驅牛向東阡雞鳴村巷白夜色歸暮田札
札耒耜聲飛飛來烏鳶竭茲筋力事持用窮歲年盡輸
助徭役聊就空自眠子孫日已長世世還復然
籬落隔煙火農談四鄰夕庭際秋蟲鳴疎麻方寂歷蠶
絲盡輸稅機杼空倚壁里昏夜經過雞黍事筵席各言
官長峻文字多督責東鄉後租期車轂陷泥澤公門少

推怨鞭扑恣狼籍努力慎經營肌膚真可惜迎新在此
歲唯恐踵前跡

古道饒蒺藜縈迴古城曲蓼花被堤岸陂水寒更深是
時收穫竟落日多樵牧風高榆柳疎霜重黎棗熟行人
迷去住野馬競棲宿田翁笑相念昏黑慎原陸今年幸
少豐無厭饘與粥

飲酒

今日少愉樂起坐開清樽舉觴酌先酒爲我驅憂煩須
臾心自殊頓覺天地暄連山變幽晦綠水函晏溫藹藹
南郭門樹木一何繁清陰可自庇竟夕聞佳言盡醉無
復辭偃卧有芳蓀彼哉晉楚富此道未必存

讀書

幽沈謝世事俛默窺唐虞上下觀古今起伏千萬途遇
欣或自笑感戚亦以吁縹帙各舒散前後互相逾瘴痾
擾靈府日與往昔殊臨文作了了徹卷兀若無竟夕誰
與言但與竹素俱倦極更倒卧熟寐乃一蘇欠伸展肢
體吟咏心自愉得意適其適非願為世儒道盡即閉口
蕭散捐囚拘巧者為我拙智者為我愚書史足自悅安
用勤與劬貴爾六尺軀勿為名所驅

感遇

旭日照寒壑鷲斯起蒿萊啁啾有餘樂飛舞西陵隈迴
風旦夕至零葉萎陳荻所棲不足恃鷹隼縱橫來

掩役夫張進骸

生死悠悠爾一氣聚散之偶來紛喜怒奄忽已復辭為
役孰賤辱為貴非神奇一朝續息定枯朽無妍媸生平
勤卑樞剝秣不告疲既死給椁槨葬之東山基奈何值
崩湍蕩析臨路陲驍然暴百骸散亂不復支從者幸告
余睠之洵然悲猫鼠獲迎祭犬馬有蓋帷佇立唁爾魂
豈復識此為畚鍤載埋瘞溝瀆護其危我心得所安不
謂爾有知掩骼著春令茲焉適其時及物非吾事聊且
顧爾私

古東門行

漢家三十六將軍東方雷動橫陣雲雞鳴函谷客如霧

貌同心異不可數赤丸夜語飛電光徼巡司隸眼如羊
當街一叱百吏走馮敬胃中函七首凶徒側耳潛愜心
悍臣破膽皆杜口魏王卧内藏兵符子西掩袂真無辜
羌胡轂下一朝起敵國舟中非所擬安陵誰辨削礪功
韓國詎明深井里絕屢斷骨那下補萬金寵贈不如土

諷當時盜殺
武元衡事

寄韋珩

初拜柳州出東郊道旁相送皆賢豪迴眸炫晃別羣玉
獨赴異域穿蓬蒿炎煙六月咽口鼻胸鳴肩舉不可逃
桂州西南又千里灘水闢石麻蘭高陰森野葛交蔽日
懸蛇結虺如蒲萄到官數宿賊滿桮縛壯殺老啼且號

饑行夜坐設方畧籠銅枹鼓手所操奇瘡釘骨狀如箭
鬼手脫命爭纖毫今年噬毒得霍疾支心攪腹戟與刀
邇來氣少筋骨露蒼白滌汨盈顛毛君今矻矻又竄逐
辭賦已復窮詩騷神兵廟畧頻破虜四溟不日清風濤
聖恩儻忽念行葦十年踐蹈久已勞幸因解網入鳥獸
畢命江海終遊遨願言未果身益老起望東北心滔滔

行路難

君不見夸父逐日窺虞淵跳踉北海超崑崙披霄決漢
出沆漭瞥裂左右遺星辰須臾力盡道渴死狐鼠蜂蟻
爭噬吞北方蟬人長九寸開口抵掌更笑喧啾啾飲食
滴與粒生死亦足終天年睢盱大志少成遂坐使兒女

相悲憐

飛雪斷道冰成梁侯家熾炭雕玉房蟠龍吐耀虎喙張
熊蹲豹躑爭低昂攢巒叢崿射朱光丹霞翠霧飄奇香
美人四向迴明璫雪山冰谷晞太陽星躔奔走不得止
奄忽雙燕棲虹梁風臺露榭生光飾死灰棄置參與商
盛時一去貴反賤桃笙葵扇安可常

跂烏詞

城上日出羣烏飛鷓鴣爭赴朝陽枝刷毛伸翼和且樂
爾獨落魄今何爲無乃慕高近白日三足妒爾令爾疾
無乃饑啼走道旁貪鮮攫肉人所傷翹肖獨足下叢薄
口銜低枝始能躍還顧泥塗畏螻蟻仰看棟梁防燕雀

左右六翮利如刀踊身失勢不得高支離無趾猶自免
努力低飛逃後患

放鷓鴣詞

楚越有鳥甘且腴嘲嘲自鳴爲鷓鴣狗媒得食不復慮
機械潛發罹罟羽毛摧折觸籠籞煙火煽赫驚庖厨
鼎前芍藥調五味膳夫攘腕左右視齊王不忍殼棘牛
簡子亦放邯鄲鳩二子得意猶念此况我萬里爲孤囚
破籠展翅當遠去同類相呼莫相顧

聞黃鸝

倦聞子規朝暮聲不意忽有黃鸝鳴一聲夢斷楚江曲
滿眼故園春意生目極千里無山河麥芒際天搖青波

王畿優本少賦役務閑酒熟饒經過此時晴煙最深處
舍南巷北遙相語翻日迴度昆明飛凌風邪看細柳翦
我今誤落千萬山身同僮人不思還鄉禽何事亦來此
令我生心意桑梓閉聲迴翅歸務速西林紫椹行當熟

楊白花

楊白花風吹渡江水坐令宮樹無顏色搖蕩春光千萬
里茫茫曉日下長秋哀歌未斷城鴉起

漁翁

漁翁夜傍西巖宿曉汲清湘燃楚竹煙消日出不見人
欸乃一聲山水綠迴看天際下中流巖上無心雲相逐

近體詩

梅雨

梅實迎時雨蒼茫值晚春愁深楚猿夜夢斷越雞晨海
霧連南極江雲暗北津素衣今盡化非爲帝京塵

同劉二十八院長述舊言懷感時書事奉寄澧州

張負外使君五十二韻之作因其韻增至八十

通贈二君子

弱歲遊元圃先容幸棄瑕名勞長者記文許後生誇鷄
翼嘗披隼蓬心類倚麻繼酬天祿署俱尉甸侯家憲府
初收迹丹墀共拜嘉分行參瑞獸傳點亂宮鴉執簡寧
循枉持書每去邪鸞凰標魏闕熊虎負崇牙辨色空相
顧傾心自不譁金爐仄流月紫殿啓晨赧未竟遷喬樂

俄成失路嗟還如渡遼水更似謫長沙別怨秦城暮途
窮越嶺斜訟庭閑枳棘候吏逐麋麋三載皇恩暢千年
聖曆遐朝宗延駕海師役罷梁澹京邑搜貞幹南宮步
渥注世惟材是梓人仰驥中驂歛刺苗人地仍逾贛石
崖禮容垂琕琫成備響鉦鍛寵卽郎官舊威從太守加
建旗翻鷲鳥負弩繞文蛇冊府榮八命中闈盛六珈官
隨胡質矯方惡馬融奢褒德符新換懷仁道併遮俗嫌
龍節晚朝訝介圭賒禹貢輸苞甌周官賦秉秬雄風吞
七澤異產控三巴卽事觀農稼因時展物華秋原被蘭
葉春渚漲桃花令肅軍無擾程懸市禁貫不應虞竭澤
寧復歎棲苴蹠躩騶先駕籠銅鼓報衙染毫東國素濡

印錦溪砂貨積舟難泊人歸山倍畚吳歛工折柳楚舞
舊傳芭隱几松爲曲傾罇石作汗寒初榮橘柚夏首薦
枇杷祀變荆巫禱風移魯婦髻已聞施愷悌還覩正奇
袞慕友漸連璧言姻喜附葭沈埋全死地流落半生涯
入郡嘗恒折逢人手盡義敢辭親恥汗惟恐長疵瘕善
幻迷冰火齊諧笑栢塗東門牛屢飯中散蝨空爬逸戲
看猿鬪殊音辨馬撾渚行狐作孽林宿鳥爲嗟同病憂
能老新聲厲似姘豈知千仞墜祇爲一毫差守道甘長
絕明心欲自剉貯愁聽夜雨隔淚數殘葩臬族音常聒
豺羣喙競呀岸蘆翻毒蜃磯竹鬪狂摩野鷺行看弋溪
魚或共拟瘴氛恒積潤訛火亟生煨耳靜煩喧蟻魂驚

怯怒蛙風枝散陳葉霜蔓綻寒瓜霧密前山桂水枯曲
沼蓮思鄉比莊烏遯世遇畦夸漁舍茨荒草村橋卧古
槎御寒衾用剝挹水勺仍柳窗蠹惟潛蝸夢涎競綴蝸
引泉開故竇護藥插新筓樹怪花因榭蟲憐目待蝦驟
歌喉易嘖饒醉鼻成戲曳捶牽羸馬垂蓑牧艾豕已看
能類鼈猶訝雉為鷄誰采中原菽徒巾下澤車俚兒供
苦筍僮父饋酸榼勸策扶危杖邀持當酒茶道流微短
褐禪客會袈裟香飯春菰米珍蔬折五茹方期飲甘露
更欲吸流霞屋鼠從穿穴林狙任攫拏春衫裁白紵朝
帽掛烏紗屢歎恢恢網頻搖肅肅罝衰榮因萸莢盈缺
幾蝦蟇路識溝邊柳城聞隴上笳共思捐珮處千騎擁

青綯

酬婁秀才寓居開元寺早秋月夜病中見寄

客有故園思瀟湘生夜愁病依居士室夢繞羽人丘味
道憐知止遺名得自求壁空殘月曙門掩候蟲秋謬委
雙金重難徵雜佩酬碧霄無枉路徒此助離憂

韋使君黃溪祈雨見召從行至祠下口號

驕陽愆歲事良牧念菑畲列騎低殘月鳴笳度碧虛稍
窮樵客路遙駐野人居谷口寒流淨叢祠古木疎焚香
秋霧濕奠玉曉光初盼蠻巫言報精誠禮物餘惠風仍
偃草靈雨會隨車俟罪非真吏翻慚奉簡書

楊尚書寄柳筆知是小生本樣令更商榷使盡其

功輒獻長句

截玉銛錐作妙形貯雲含霧到南溟尚書舊用裁天詔
內史新將寫道經曲藝豈能裨損益微辭祇欲播芳馨
桂陽卿月光輝徧毫末應傳顧兔靈

登柳州城樓寄漳汀封連四州

城上高樓接大荒海天愁思正茫茫驚風亂颭芙蓉水
密雨斜侵薜荔牆嶺樹重遮千里日江流曲似九迴腸
共來百越文身地猶自音書滯一鄉

柳州寄丈人周韶州

越絕孤城千萬峯空齋不語坐高春印文生綠經旬合
硯匣留塵盡日封梅嶺寒煙藏翡翠桂江秋水露鰓鱗

丈人本自忘機事為想年來憔悴容

得盧衡州書因以詩寄

臨蒸且莫歎炎方為報秋來雁幾行林邑東迴山似戟
牂牁南下水如湯蒹葭淅瀝含秋霧橘柚玲瓏透夕陽
非是白蘋洲畔客還將遠意問瀟湘

嶺江南行

瘴江南去入雲煙望盡黃茆是海邊山腹雨晴添象跡
潭心日暖長蛟涎射工巧伺遊人影颺母偏驚旅客船
從此憂來非一事豈容華髮待流年

柳州峒氓

郡城南下接通津異服殊音不可親青箬裹鹽歸峒客

綠荷包飯趁墟人，鵝毛禦臘縫山。剝雞骨占年拜水神，
愁向公庭問重譯，欲投章甫作文身。

別舍弟宗一

零落殘紅倍黯然，雙垂別淚越江邊。一身去國六千里，
萬死投荒十二年。桂嶺瘴來雲似墨，洞庭春盡水如天。
欲知此後相思夢，長在荆門郢樹煙。

江雪

千山鳥飛絕，萬徑人蹤滅。孤舟蓑笠翁，獨釣寒江雪。

與浩初上人同看山寄京華親故

海畔尖山似劒鉞，秋來處處割愁腸。若為化得身千億，
散作峯頭望故鄉。

柳州二月榕葉落盡偶題

官情羈思正悽悽，春半如秋意轉迷。山城過雨百花盡，
榕葉滿庭鶯亂啼。

浩初上人見貽絕句欲登仙人山因以酬之

珠樹玲瓏隔翠微，病來方外事多違。仙人山不屬分符客，
一任凌空錫杖飛。

殷賢戲批書後寄劉連州并示孟崙二童

書成欲寄庾安西，紙背應勞手自題。聞道近來諸子弟，
臨池尋已厭家雞。

重贈

聞道將雛向墨池，劉家還有異同辭。如今試遣隈牆問，

已道世人那得知

世上悠悠不識真薑芽盡是捧心人若道柳家無子弟

往年何事乞西賓

按禹錫酬家雜之贈云日日臨池弄小雛還思寫論付官奴柳家新樣元和脚且盡薑芽斂手徒官奴王羲之

女名羲之樂毅論書賜官奴時子厚未有子故云

疊前

小學新翻墨沼波羨君瓊樹散枝柯在家弄玉唯嬌女

空覺庭前鳥跡多

夏晝偶作

南州溽暑醉如酒隱几熟眠開北牖日午獨覺無餘聲

山童隔竹敲茶臼

御定全唐詩錄卷第三十七



